



# Dirgahayu Datuk Seri

UM 31/10/2003 - 49 PRECISE

- Terima kasih sejaluran panjang  
Jasamu kepada tanah tercinta, Malaysia.

Datuk Seri, negeri kita permai dan cantik di  
tantangan masa  
Damainya persis teratai berkembang mekar di  
kolam nusa  
Rukun penduduknya laksana ukiran tersusun elok  
di persada cipta  
Kesegalaan ini mengundang sedar, insaf dan ingat  
Akan kecekalan seorang engkau bernama teknokrat  
Bagaimana kau kerah kudrat mendepani desak  
dan getir duga  
Kau tahu arah, faham lorong berliku  
Laluan warga tercintamu yang kau cinta  
Ketika jagat celaru memilih haluan  
Kau bisikkan azimat ke telinga bangsa  
Hapuskan jiwa hamba, bina maruah gemilang  
Dan, kita tak lagi akan dihina.

Demikian, Datuk Seri kadang-kadang kami  
Menamakan kau lelaki penawar sejarah  
Sejarah bangsa berabad-abad luka kau ubati  
dengan yakinmu pasti  
Parut yang tertinggal di jasad peribadi terjajah  
Selapis demi selapis kau padamkan tak menanti  
Hapus kongkongan psikologi sentak keangkuhan  
Barat  
Kau suntikkan waja semangat lebur leka tertunda  
Padamkan longlai jiwa tanggalkan kerdil diri  
Mari jadi bangsa berani  
Katamu berjengket ditinggalkan, berengsur  
disisihkan  
Sedang kemerdekaan lama telah kembali ke

genggaman  
Di podium antarabangsa berdiri gagah engkau  
Bersuara memberikan akal kepada dunia  
Datuk Seri, kaulah negarawan  
Yang membawa utus kebangkitan dan keagungan  
Sebuah bangsa yang kau rindukan.

Apakah ada lagi, Datuk Seri bahasa terindah  
Yang mampu kupilih untuk menyatakan  
keagungan ini  
Seorang pilihan engkau yang telah  
Mewarna-warnikan tanah air dan kehidupan  
Seorang bapa, seorang penyanjung perdamaian,  
seorang pahlawan  
Perkasa tak pernah tergoyahkan tajam cabaran  
Percayalah, telah kau berikan kami terbaik  
Dari segala perah ikhtiar dan tumpah keringat  
Makanya, kata-kata sanjungan dan terima kasih ini  
Jadi terlalu sedikit dan jauh amat dari mencukupi  
Untuk sejaluran perit pengorbanan, mulia jasa  
jadi ukir kemegahan tertinda emaslah  
di jiwa anak watan  
Akan sentiasa kami hayati bijaksanamu  
Lestarikan landas aspirasi dari segala  
Perjuangan yang telah kau perjuangkan  
Datuk Seri, dirgahayu  
Doa untuk kesejahteraanmu selamanya  
Dalam erat rangkul kasih Yang Maha Esa.

- LIM SWEE TIN, Langkawi 2003  
(Pemenang SEA Write Award)